

後崑崙之室北洞之源字方一文蔚燦爛
四合垂芒虛生曉曉若存若亡流光紫氣拂
其穢黃金治鍊瑩其文遂經累劫字體鮮明
至上皇元年九月十七日七聖齊靈清齋長
宮金青盟天跪誓各靈奉受靈文高上解其
曲滯七聖通其妙音記為迴天九霄得道之
篇刻以白銀之簡結以飛青之文藏於雲錦
之囊封以啓命之章付於五老仙都左仙公
掌錄瓊宮也

四會成字

玉帝七聖玄記云七聖玄記迴天上文或以
韻合或以支類相參或上下四會以成字音
或標其正諱或單復相兼皆出玄古空洞之
中高真撰集以明靈文後學之人若有玄名
者得見此文青空採加角名四司所保五帝
記名也

琅簡藥書

八素經云西華宮有琅簡藥書當為真人者
乃得此文

石碩

三洞珠囊云西王母以上皇元年七月於南
浮洞室下教以授清虛真人王君傳於夏禹
禹封文於南浮洞室石礪之中礪亦有作此
碩者故五符云九天靈書猶封於石碩是也
今檢諸字類無此碩字也王訣下云五老真

文封題玉礪亦其例也孔靈符會稽記云會
稽山南有宛委山其上有石俗呼為石黃壁
立千雲累梯然後至焉昔禹治洪水厥功未
就齋於此山發石簣得金簡字以知山河體
勢於是疏導百川各盡其宜也

雲笈七籤卷之七

正一天師清微第
道教學社

雲笈七籤卷之八

學人

三洞經教部

經釋

釋三十九章經

大洞真經云高上虛皇道君而下三十九章道
君各著經一章故曰三十九章經乃大洞之
首也

第一章

高上虛皇君曰元氣生於九天之上名曰辟
非辟非之煙下入人之身而為明梁之氣居
人五藏之中處乎心華之下此至氣之所在
長煙之所託能知辟非之由者乃得領祖太
無領祖太無者盡體虛玄之大冠道素之標
矣益元羽童乃人鼻之神也衆風亂玄人鼻
之氣也四清撫開乃鼻下口上之間也當令
鼻氣恒開又當數加手按讀此篇捻鼻間乃
高上之正座天嶽之混氣氣之來也解百結
鼻神翩翩列坐綠室綠室者脣上入中之際
也是以帝一上景攝煙連衆長契虛運及華

自然矣易有者九天之上西北之門名也若既登易有之門乃得昇帝堂之會然後五塗既化森羅幽鬱音暗甘太和萬唱幽發百混九迴還而順一耳太一隱生之實人之心也乃明梁之所館辟非之所棲是故七祖反生道濟帝簡高上之旨理於此矣讀高上之洞經既畢乃口祝曰三藍羅波連臺此九天之祝言高上之內名也夫三藍羅波連臺者於地上之音曰天命長人常寧也易有者於地上之音曰長臺

第二章

上皇玉虛君曰玄歸者於九天之音曰泥丸也天晨金霄帝一雌雄之道天晨為雌金霄為雄雄一之神曰晨雌一之神曰霄玉州黃錄者帝之金簡也德刃者九天之臺名也

第三章

皇上玉帝君曰玉帝有玄上之幡一名反華之幡皆玉帝之旌旗招仙之號今也以制命九天之階級微召四海五嶽之神王也九天真人呼曰為濯耀羅三天真人呼曰為圓光

蔚玉清天中有樹似松名曰空青之林得食其華者身為金光自非妙尋雲景而金房不登自非重誦洞章而玉寶弗見也若既陟其塗則可以窺森然晃朗之門而手振空青之華也

第四章

上皇先生紫晨君曰太冥在九天之上謂冥氣遠而絕乎九玄惟讀大洞玉經者可以交接其間也故謂洞景寄以神道耳又玉清天中有綺合臺下有萬津之海其水波湧如連嶽焉

第五章

太微天帝君曰九天真人呼風為浮金房在明霞之上九戶在瓊闌之內此皆太微之所館天帝之玉宇也

第六章

三元紫精君曰紫精之天處太無之中三元之氣在上景之衢秀朗者玉清天中臺名太混者玉清天中殿館名明明者上清天人之車名也

第七章

真陽元老玄一君曰真陽者上清之館名玉皇者虛無之真人逸宅者真氣之明堂丹玄乃泥丸之所在也若能七轉洞經於震靈之上三四帝尊於白氣之中則真人定錄而魔王立到則注生藉於玉闕招五老於金臺矣

太上瓊闕之門合延為胎命之玉玄一為三氣之尊元老為上帝之賓並扶兆身神臺刊名於福連之簡也太上金簡玉札名為福連之書

第八章

上元太素三元君曰太素三元宮中有三華之氣生於自然也似芙蓉之暉晨燈者乃玉真天中明氣之光洞照於三元之臺也廣靈堂者上清之房名兆若能存雌一於夙夜誦洞章以萬遍者則太微小童負五圖於帝側

絳宮真人承五符於胎尊合變於三素之氣得形於晨燈之光則人無災兆終身不亡矣
第九章
上清紫精三素君曰上清紫精天中有樹其

葉似竹而赤其華似鑑而明其子似李而無核名曰育華之林食其葉而辟飢食其華以不死食其實即飛仙所謂絳樹丹實色照五藏者也自非長冥眇思接神太無而育華之實不可得而食也上清玉房生七寶之雲雲

色七重其氣九扇以童子辟非童女宜彌得乘此寶雲上入玉清之天也而辟非者太微之內神宜彌者玉清之神女若此能離合百神間關帝一變化九魂混暢五七者則辟非可賴宜彌可致七度死厄三光所利五老延日以曲照太上三便以相入矣三便者太上金房之名也

第十章

青靈陽安元君曰青靈者真人之位號八氣者雲色之相杳元君者虛皇之司命三華者玉清之房名乃陽安元君之所處也

第十一章

皇清洞真道君曰皇清乃上清三仙皇之真人也洞真乃上清元老之君也皆俱合生於太無之外俱合死於廣漠之上能生能死是

以皇清洞真三帝合生理出於此矣日母者玉清之老母主胞胎於尊神也名曰正齋條兆能知日母之名則胞結自解七祖罪消

第十二章

高上太素君曰高上皇人常宴紫霄之上玉根者玉清天中山名也乃五老上真之所治太素真人拂日月之光於帝一之前太素天中呼日為眇景也玉門蘭室並是上清宮中門戶名也月中樹名窈窕一名藥玉凡有八樹在月中也得食其葉者為玉仙玉仙之身洞微如水精瑠璃焉

第十三章

皇上四老道中君曰皇上四老真人在日中無影呼日名為九曜生常乘明玉之輪轉宴於日中也廣霞者玉清天中山名乃九日之所出矣日帝之所司也

第十四章

玉晨太上大道君曰道君係形景於法化之內回眇鏡於上清之上解襟帶於玉映之室乘八素入於四明之門反日中之神王併月

中之高靈矣玉映者玉晨之宮名四明者上清玉帝之南門也

第十五章

太清大道君曰太清天中有山名浮絕三天神王之所治也彼天人呼日為太明又有金華樓諸受真仙玉錄者皆在此樓之中

第十六章

太極大道元景君曰太極有元景之王司攝三天之神仙者也太漠者太清之外也太極真人呼日為圓明

第十七章

皇初紫元君曰皇初紫元之天常有暉暉之光鬱鬱如薄霞焉乃九日之所出有如一日之照耳六淵者乃元君之宮名寒童者山名也故曰登寒童之嶽會六淵之中矣

第十八章

無英中真上老君曰無英中真上老君處上真之宮領五帝之籍解兆五符於重結化兆五神於胎骨常遊紫房明堂之內也

第十九章

中央黃老君曰中央黃老君三元之真皇也
圓華者黃老之宮名也玉壽者太微天中之
山名也皆黃老君之理所

第二十章

青精上真內景君曰青精之宮有上華之室
室中有自然青氣號曰返香之煙逆風聞三
千里紫空者內景之山名也青精君常乘羽
逸之車攝玄景之童登紫空之山入玉室之
內也

第二十一章

太陽九氣玉賢元君曰太陽九氣者變化三
晨之上策駕紫輶於微玄之下微玄者日中
之神名曰玉賢天中或呼曰為微玄也開陰
太漠者是胎神之所在也胎門既塞乃滯血
之所穢胎門既開而嬰神之所棲太漠為玄
重之根開陰為常生之源若胎開而明潔則
帝一之氣全也若太漠之內修則五老之安
歡故云開陰太漠長保陽源陽源者猶人之
有勢也兆能使陽源不傾玄泉不動淡然淵
停潭然天靜亦迴老駐年與靈均氣也

第二十二章

太初九素金華景元君曰太初天中有華景
之宮宮有自然九素之氣氣煙亂生雕雲九
色入其煙中者易貌居其煙中者百變又有
慶液之河號為吉人之津又有流汨之池池
廣千里中有玉樹飲此流汨之水則五藏明
徹面生紫雲

第二十三章

九皇上真司命君曰九皇上真者玉虛之元
君也四司者天帝之禁宮也晨暉者玉虛司
命之宮名也飛霞者玉虛天中之山名逸錄
者仙皇之符籙也

第二十四章

天皇上真玉華三元君曰天皇上真者是上
清真人之典禁主玉華仙女之母故號曰玉
華三元君也乘神輶之車登雲騰之宮入流
逸之室神輶者是真人一輪車名九曲下戶
者是男女之陰地也男曰九曲女曰下戶此
陰地常生白雲之氣以薰黃庭之間是得道
之候驗也

第二十五章

太一上元禁君曰太一上元君者萬仙之司
主方獻真氣也主除死籍刻書生簡赤氣王
者日中之上神其名曰將車梁能知赤氣王
名者不死

第二十六章

元虛黃房負辰君曰元虛黃房者是真晨仙
君之所治也玉宮者是得道符籍之所在也
九元鎮真者是九元太帝之名也太帝名鎮
字真兆能知之者不死

第二十七章

太極主四真人元君曰太極元君乘凌羽之
車結雲氣以雕華控九龍以齊驟揚威於高
上之天轉轂於大明之丘鳴鐘於朱火之臺

第二十八章

四斗中真七晨散華君曰玉清天中有散華
之臺是四斗七晨道君之所治也七晨天中
有反生之香氣反衝於三寶之山山在四斗
之中上有金球之館名曰映清夷之宮其中
上皇真人皆項負寶曜體映圓光氣合三寶

靈洞五藏也洞經所謂香風扇三寶五藏映清夷

第二十九章

辰中黃景元君曰辰中真人帶迎延之符登太霄之庭飛羽輪於滄浪之臺佩玉章之文於太霞之宮

第三十章

金闕後聖太平李真天帝上景君曰金闕之中有上景之氣氣色鬱鬱輝照十方乃後聖之靈都太平之所會也種年祚於日氣之中植三命於月宮之庭五毒絕於沈沒解結生於天堂

第三十一章

太虛後聖無景彭室真君曰太霞之中有彭彭之室結白氣以造構合九雲而立宇紫煙重扉神華所聚故號曰彭彭之室而太虛元君之所處焉

第三十二章

太玄都九氣丈人主仙君曰太玄都九氣丈人乘晨細之風登蕩滯之山煥鬱然之煙入

太暉之宮伐胞樹於死尸養胎氣於冥初濟五毒於常關定三命於金書

第三十三章

上清八皇老君曰上清之天在絕霞之外有八皇老君運九天之仙而處上清之宮也乘廣琅之車把鳳羽之節登華使之山入太老之堂上清真人呼日月為太寶九華

第三十四章

東華方諸宮高晨師王保仙王曰青童君東華者仙真之州也在始暉之間高晨王保王所治也東華真人呼日為紫曜明或曰圓珠青童君乘雕玉之軒御圓珠之氣登雲波之山入東華之堂

第三十五章

搏桑太帝九老仙皇君曰九老京者山名也在搏桑之際九老仙皇處搏桑之際治九老之京太帝君治搏桑之杪會方丈之臺也二道君時乘合羽之車合羽車者雲沓之色登搏桑之杪會九老之京出靈戶之符召大魔之王矣

第三十六章

小有玉真萬華先生主圖玉君曰小有玉真天中有萬華之宮小有先生主圖玉君之所治也此宮之中藏錄上帝之寶經玉清之隱書也又有洞觀之堂懸在太無之中重泉曲者魔王之陰府也兆既得洞一之道乃拔死於泉曲之籍書仙名於靈羽之錄

第三十七章

玄洲二十九真伯上帝司禁君曰玄洲有三溺之津非飛仙而莫越也又有羽景之堂在太無之庭又有絕空之宮在五雲之中玉靈仙母金華仙女常所遊也司禁真伯上帝玉君時乘日月之軒披虎文之裘登重漢之山入宴羽景之堂濯纓帝川之池會仙絕空之宮也

第三十八章

太無晨中君判我嶺山中洞宮玉戶太素君曰太無在洞景之表太素在幽玄之上九宮列金門於大素之表丹樓沓七重於太無之庭乃太素三元君所遊也

第三十九章

西元龜山九靈真仙母青金丹皇君曰崑崙山有九靈之館又有金丹流雲之宮上接璇璣之輪下在太空之中乃王母之所治也西元龜山在崑崙之西太帝玉妃之所在

釋太上大道君洞真金玄八景玉籙

經釋題曰東華上仙名太上八素隱書南華上仙曰大洞真經西華上仙曰金真王光映天洞觀玉經北華上仙曰蕭條九曜露落七元上經玉皇中仙曰太上高聖八景玉籙中夾黃老君南極元君藏錄二經於太素瑤臺玄雲羽室封以鬱林之笈玉清三元之章乃命北寒金臺龍華玉女七百人又命白空虞宮西靈玉童七百人侍衛焉晉永和十一年歲在乙卯九月一日夜半受經於紫微王夫人凡二萬二百三十字其大洞真經一萬字上清高聖太上道君金玄八景玉籙上清高聖太上大道君者蓋二晨之精氣慶雲之紫煙玉暉輝煥金映流真結化含秀苞凝玄神寄胎母氏育形為人諱嚳天真字開

元母姪三千七百年乃誕於西那天鬱察山浮羅嶽丹玄之阿於是受書玉虛眺景上清位為太上高聖玉晨大道君治藥珠日闕館七殿紫房玉童玉女各三十萬人侍衛於是振策七園楊青建朱騰空儻蒼駕景騁騰徘徊八煙盤桓空塗仰簪日華拾落日珠摘絳林之琅寶餌玄河之紫蕓僊塞靈軒領理帝書萬神八拜五德把符上真侍晨天皇抱圖乃仰空而言曰子欲為真當存日中君駕龍騰鳳乘天景雲東遊桑林遂入帝門若必昇天當思月中夫人駕十飛龍乘我流鈴西朝六領迷詣帝室精根運恩上朝玉皇會眷敷營儀以躡景晃晃散結璘以暨霄雙皇合輦後天而燭夫大有者九天之紫宮小有者清虛三十六天之首洞於是

太上大道君初乘一景之輿駕八素紫雲攝希微倉帝名錄豐子俱東行詣鬱悅那林昌玉臺天見玉清紫道虛皇上帝受九暉大晨隱符太上大道君次乘二景之輿駕七素絳雲攝

中微赤帝名定無彥俱南行詣高桃厲沖龍羅天見玉清翼日虛皇太上道君受觀靈元晨隱符太上大道君次乘三景之輿駕六素紅雲攝紫微白帝名渠淵石俱西行詣碧空歌飲黎天見玉清昌陽始虛皇高元君受總晨九極隱符太上大道君次乘四景之輿駕五素青雲攝玄微黑帝名齊元旋俱北行詣邨摩坦婁于醫天見玉清七靜道生高上虛皇君受沓曜旋根隱符太上大道君次乘五景之輿駕四素黃雲攝始微上帝名接空子俱東北行詣扶力蓋浮羅天見玉清太明虛皇洞清君受玄景晨光隱符太上大道君次乘六景之輿駕三素綠雲攝靈微中帝名秉巨文俱東南行詣具謂耶渠初然天見玉清始元虛皇太霄君受合暉晨命隱符太上大道君次乘七景之輿駕二素紫雲攝

雲笈七籤 卷八

宣微下帝名宏膚子俱西南行詣冲容育鬱
離沙天見玉清七觀無生虛皇金靈君受齊
暉晨玄隱符

太上大道君次乘八景之輿駕一素靈雲攝
洞微真帝名泗澄摠俱西北行詣單綠察寶
輪法天見玉清八觀高元虛皇溥景君受高
上龍煙隱符

太上大道君又乘洞景玉輿駕太霞紫煙玄
景之暉攝九微內帝君名申明開及上皇九
玄九天諸真仙王等俱仰登彌梵羅臺霄絕
寥丘飛元雲根之都玉清上天見玉清紫暉
太上玉皇明上大道君受高太虛無極上
道君隱符

釋太上神州七轉七變傳天經

神州在天關之北日月迴度其南七星輪轉
其中央畫左迴八緯夜右轉七經七星運周
天光迴靈此上皇紫晨受化之庭修七轉之
法位登於玉清
七轉七變之道上皇紫晨君受於九天父母
修行道成以傳玄感清天上皇君皇君以傳

三天玉童玉童以傳紫極真元君紫極真元
君傳天帝君天帝君傳南極上元君南極上
元君傳太微天帝君太微天帝君傳後聖金
闕君後聖金闕君傳上相青童君承真相系
皆迴萬劫一傳小有天王後撰一通以封於
西城山中得者皆奉迎聖君於上清宮給玉
童玉女各二十一人典衛靈文營護有經者
身

神州玉童凡十四章乃十四帝君洞野之曲
百神內名玉天之玄象三晨之精誦其章玉
響激明上元誦之萬遍白日昇天

釋神虎上符消魔智慧經

神者靈也靈變無窮陰陽不測名之曰神也
虎者威也威震九遐之域神光煥乎上清上
者太上秘乎靈都上官神虎七千備于玉闕
因以為名符者信也太上之信召會群靈消
魔者滅鬼也凡有玉簡紫名得修上經莫不
為眾邪所乘鬼魔所試兆當諷誦此經則激
百陽以生雷鼓千陰以吐威六天失氣九魔
消摧也智者日中之星也慧者宜以生為

急也故慧字有兩生升而共乘一急之象者
也誦經五千遍則神智開朗聖慧明發命八
景以高登騎神虎以飛昇此大威變之道故
以消魔為名

釋太上素靈洞玄大有妙經

太者大也彌綸而不可極故曰太也上者處
乎無窮之表故曰上也是道君之號也素靈
者房名也洞者洞天洞地無所不通也玄者
幽冥之所出也大有者官名也妙者微之極
也經者營也弘暢幽極經理神開故謂之經
而有玄丹上化三真元洞之道本與玄氣同
存元始俱生三精凝化結朗玉章構演三洞
之府總御萬真之淵乃秘在九天之上大有
妙宮金臺玉室素靈之房翁鶴玄玄之上蕭
蕭始暉之中是時上聖象帝清齋三月仰稟
太冥玄思感於大寂積稔啓於上清而受焉
因經所藏之處而以為名

釋迴元九道飛行羽經

迴元者運星元之綱輪也輪空洞之大輻調
四氣之長存九道者北斗九星也九星之運

觀渙五常五行乘之以致度萬物稟之以得生皆九道之運也飛行羽經者九天父母太真丈人同宴景龍之輿息駕無崖之端忽致玄靈瑞降白鶴之車黑翮之鳳口銜素章登空步虛經歷無窮因名白羽黑翮飛行羽經

釋九靈太妙龜山元錄

龜山在天西北角周迴四十萬里高與玉清連界西王母所封也元錄者九虛上真始生變化大妙之法記為名錄也皆刻書龜山流精紫閣金華瓊堂其旨隱奧其旨宛妙蓋九天書錄名題龜山

釋大有八稟太丹隱書

大有官名也在九天之上八者八節也稟者授節度也太丹南宮名也隱藏也書文也言八節吉辰天上宴會八稟開真大慶之日其時乃萬神集議皆列言大有之宮為學之士以其日清齋首過即上生於南宮也

釋七聖玄記迴天九霄經

七聖者高聖王帝君高聖太上大道君上聖紫清太素三元君上聖白玉龜臺九靈太真

西王母上聖中央黃老君上聖樽桑大帝君後聖金闕帝君也玄記者七聖各逆注得道之人玄名也迴天者太上道君携契玉虛紫

賓迴天傾光上登九層七映朱宮徘徊明霞之上蕭條九空之中列七範於仙錄刻玉名

於隱篇九霄九天也一名九空上聖帝君受命於九空結飛氣成自然之字玄記後學得道之名靈音韻合玉朗稟真或以字體或以隱音上下四會皆表玄名

釋曲素訣辭五行祕符

曲者臺名也素者八方之素也玄都上有九曲峻嶒鳳臺皆結自然鳳氣而成瓊房玉室處於九天之上玉京之陽虛生八會交真之氣十折九曲洞達八方上招扶搖之翮傍通八素之靈故以曲素為名訣者旨詣也辭者憂樂之曲也結九元正一之氣以成憂樂之辭上慶神真之歡下悲兆民之憂故曰憂樂之辭也五行者金木水火土也祕者藏於上清瓊宮也符者文也五色流精凝而成文也混化萬真總御神靈

釋天關三圖七星移度經

天關三圖者九天之上有關玉臺一名天關一名天圖一名天關是九天之生門關之樞機也其西五千里則金闕宮東九千里則青華宮上去玉清宮七千里是衆真之所經神仙之所歷學者之所由也七星者斗星也移度者歷轉也日月迴周其境七星歷轉其關上運九天明皇之氣下潤流灑梵行諸天高上玉帝出入遊宴之道乃學者簡錄所通之門上相所撰以挾後學有知上帝宮館之次第上真所遊處刺成真人也

釋除六天玉文三天正法

除者罷也六天者赤虛天泰玄都天清暗天泰玄天泰玄倉天泰清天此六天起自黃帝以來民人互興殺害不稟自然六天之理於茲而興太上給以鬼兵使於三代之中驅除惡民而六天臨治轉自偽辭太上下玉文遂截六天之氣更出三天正法割惡救善三天者清微天禹餘天大赤天是也

釋青要紫書金根衆經

